

原书缺页

學前爲萬厯七年同知張祖良開今按舊志此外於
國朝修纂者並未載入至乾隆三十一年奉 文查取
重修冊籍申送 京中一統志館祇稱乾隆八年舊
冊被火無存唯乾隆九年知縣繆集詳請重修又二
十六年署縣張德履詳請補修而已然今石刻四城
門名題識河陽門爲崇禎十三年知縣張兆熊立凝
翠門爲正德十五年知縣劉澄立迎秀門其題識莫
辨唯門內壁上嵌有雍正六年小碑云知縣朱永慶
管河帥定朝重修東門樓云云又拱極門爲順治甲
午知縣劉楷立意入

國朝後劉朱二知縣皆曾重修而案牘莫考耳

又按舊志謂城於金大定中自孟州故城徙築至明景泰間始稱知縣賈珍重修然按元史云孟州朱隸河北道金大定中爲河水所害北去故城十五里築今城徙治焉故城謂之下孟州新城謂之上孟州元初治下孟州憲宗八年復立上孟州云云是此城於金時自下移上於元初又從上徙治於下旣又自下徙治於上其間修築者固當不一卽如元中統間重立孟州三城記石刻尙存其稱宣差長官范真重建之績甚詳此可見也其文載後碑碣志內茲不別錄又按舊志但稱金大定中自孟州故城徙今治而孟州故城始自何時竟不復言以今考之古河陽縣城

在今縣南三十五里俗稱魏野鎮卽方輿紀
要所云自漢以來皆治此者是也終唐之世以至宋
初猶然觀宋太平寰宇記所云南浮橋在縣一里卽
晉太始杜預造橋處云云按所云浮橋卽指在野戍
者而言而與縣相去一里是宋太平興國時城尙在
野戍鎮其後移徙則不見於諸書唯今縣西十七里
東窰村有宋千牛衛府君廷諤及其妻高平縣君徐
氏墓誌銘出土云寶元二年葬於孟州西北二十里
北號原按東窰村東里許有號村蓋卽所謂北號原
者其地正在孟州故城西北二十里是宋寶元前城
已自野戍鎮移至今縣南十五里濱河地後金元間

稱爲下孟州故城者是也然今縣城學宮內有宋大中祥符元年御製元聖文宣王贊加號詔其碑陰爲宋孟州重修文宣王廟記碑雖剝落尙可辨其歲月碑額夫今城乃金大定中所立何以有宋建州學碑在此竊意此碑初造時本在野戍鎮城學內及移治今縣南十五里下孟州當以其有當朝御製贊刻於碑前遂與學同遷而其後再并學遷於今縣耳或謂太平興國後大中祥符前或城已移至今縣南十五里下孟州而是碑初造卽在其地至金始并學移於今縣亦未可定竊意此亦未然蓋大中祥符元年在太平興國後僅二十餘年使太平興國後卽遷於今

縣南十五里下孟州而創立州學不應十餘年之間
遽爾頽落以致遂云重修也是則碑云重修者尙指
在野戍鎮之舊學而言及大中祥符元年以後寶元
二年以前三十年之間而城與學方移於今縣南十
五里濱河地而其後爲下孟州耳卽舊志於宋之平
嵩閣德威堂太師堂禮賢館古蹟亦謂皆在舊孟州
治按此所建堂館之由皆元祐間事而所謂舊孟州
治蓋卽指今縣南十五里下孟州故城而言是亦可
借證者但舊志不明言其城始自何時耳又今縣署
內又有宋宣和六年御筆改修孟州門頒詔廳碑其
文不盡可辨此自是州治自野戍鎮徙至縣南十五

里後所立之碑其後徙治今縣亦與署同遷耳載觀
元中統重立孟州三城記稱么公移築公廨私第庵
觀寺廟一依舊制此亦可想見碑與署同遷也其大
中祥符加號詔并重修孟州學記碑暨宣和改修孟
州門頒詔廳碑亦俱見後金石志內茲不別錄耳
元尙企賢撰重立孟州三城之記文載後金石志下
卷

元分司揆務重立孟州碑即孟州三城記碑陰并載
後金石志

明余宗增修城垣碑殘缺不錄但辨崇禎六年等字
而已

公署

知縣署在城中大堂三楹南向堂前爲戒石坊又前爲儀門三楹又前爲大門五楹又前爲大照牆一座大堂下東吏舍九楹西吏舍九楹又東北偏吏舍五楹西北偏吏舍五楹儀門左右爲東西角門二楹大門內東南爲馬步班房四楹正西爲民壯班房三楹大堂後爲宅門又後爲二堂三楹二堂下東爲門房三楹二堂後爲三堂三楹曰福謙堂三堂後爲內宅門又後爲四堂三楹四堂東偏三楹西偏二楹三堂東偏爲退思軒三楹西偏三楹二堂東爲瑞豐軒三楹西爲西書房三楹其南爲幕客房三層共十楹西書房又西爲虛舟亭北爲

揚清軒三楹餘房不載庫在大堂上東偏獄在儀門內西
南蕭曹廟三楹在儀門東關帝廟三楹又在其東馬
王廟三楹在大門內東北之河陽驛內漕倉在大門內
正東

舊志云縣治始金大定中尚爲孟州廳署無考明洪
武三年同知黃道因舊址重建大堂後堂過廳幕廳
各三楹正德中知縣劉澄重修大門儀門庫房萬厯
十九年知縣黃應乾改大堂前戒石亭爲坊二十五
年知縣杜應楚重修大門譙樓至

國朝順治元年十月中俱燬于寇十一年知縣劉璠重
建前後堂各三楹大門樓三楹康熙二十九年知縣

劉凡重建東西吏舍十八楹云至乾隆三十一年奉
文查取重修冊籍據覆稿但稱縣署大門庫房及大
門內二門內牆垣不過隨時修理並無大工云今按
大堂正梁題云乾隆三十一年知縣趙國賢重修二
堂正梁題云乾隆三十四年知縣牛聯奎重修邑人
云是年并改譙樓爲大門云至二堂東瑞豐軒在前
爲樓不知何人建前令魯鴻重修改題軒額并自爲
銘三堂題梁無考而堂名福謙爲前令王如金所題
四堂并堂東西偏及下左右房各三楹係乾隆五十
一年知縣李廷讓詳請借廉修建又大堂下東吏舍
九楹乾隆二十六年被水知縣江湄重修西吏舍九

三
五
楹乾隆八年被火知縣丁永琪重修其虛舟亭揚清
軒爲乾隆五十四年知縣仇汝瑚添蓋揚清軒馮敏
昌撰記外并詳請借廉重修三堂云

魯鴻撰瑞豐軒銘

有樓奕奕在堂之東圯于淫雨永夏方中余初莅孟
廢墜交黻倉庾館舍事先急公今夏麥稔政簡民雍
累臺構屋弗替前功成幾不日顏曰瑞豐旣堅旣壯
匪飾匪崇升階拾級無壞爾躬軒扉四啟無蔽汝聰
無攘與下民氣斯通無詎無祝是謂大同

附馮敏昌撰揚清軒記

孟縣在宋爲孟州之河陽縣縣治在今縣南十八里

慶歷中令鮮于亨作揚清閣聯芳亭于縣治之圃蓋
慕前令潘安仁種花之治而寓激厲貪濁之心後既
圯至元祐中令高元於閣址作亭用其名曰揚清而
黃山谷先生爲之記以謂名因其舊不掩前人之善
云迨金時州遷今治歷元明以至我

朝又數百年亭址益無可問乾隆丁未靈山仇汝瑚序
東來爲令始至卽有慕于古人并有慕于古人之慕
古人者蓋越三年而後乃作是軒復用其名曰揚清
蓋其慎也或曰子何不仍聯芳之名而仍揚清之名
曰芳固未易聯也而清不可以不揚故以揚清名軒
云爾猗嗟仇君能以是爲心將一清而慎與勤皆可

五鼎元卷二
相因而至與夫六事之本于廉者又何以異哉仇君
其益永此心以慕乎古人焉可矣仇君屬余爲記余
無山谷之筆特與仇君爲姻親因得不循游揚之文
但以斯言勉之而并爲銘曰

昔人有言和光同塵而又有言好惡同民惟民之情
好善惡惡同民之道揚清激濁能同此心何必形骸
軒前有池林外花開

主簿署在縣署大堂西大堂三楹堂前爲二門大門在
東大堂後爲二堂三楹又後爲三堂三楹二堂東爲東
書房三楹餘房不載

按主簿署始建無考乾隆三十七年主簿楊嘉善詳

請借廉修理二門大堂書房上房住房共十五間乾隆四十五年楊嘉善又詳請借修東住房廚房并添建二堂三間

典史署在縣署大堂東大堂三楹堂前爲大門大堂後爲二堂三楹又後爲三堂三楹又後爲四堂三楹二堂東爲東書房三楹

按典史署始建無考乾隆四十八年典史張葆重修教諭署在縣學明倫堂東偏迤北前堂三楹後堂三楹餘房不載

舊志云教諭宅今廢又云訓導宅二所一改爲教諭宅順治十二年教諭王政舉建康熙二十三年教諭

姚奏重修一現今傾圮又後一條云學設教諭一員
訓導二員明末裁訓導一員

國朝順治五年再裁訓導一員後又裁教諭設訓導二
員康熙十九年仍設教諭一員按據此則今教諭宅
當是前訓導宅卽王政舉并姚奏修者其云一現今
傾圮者當爲下所載今訓導宅耳

訓導署在明倫堂西偏迤南前堂三楹後堂三楹餘房
不載

按訓導署始建無考舊志載訓導宅二所其一改爲
教諭宅一現今傾圮云云按今宅乾隆元年知縣程
仁秩訓導劉執璣重修當卽所云一現今傾圮者

城守署在縣署東南大堂三楹前爲二門又前爲大門
三楹大堂後爲二堂三楹庫房一間餘房不識

按城守署舊無可考後因縣署東南節孝祠之東有
公所一處傳是察院行署舊志云中察院在縣
東今廢是也歷任修理借住乾隆五十三年城守閫
泰鳳仍建頭門二門并修理借住

庫房在縣署大堂東偏一楹

按庫房舊志不載大約舊隨大堂創修者

漕倉在縣署大門內正東凡二十六楹

按舊志但有預脩倉無漕倉今漕倉始建無考房內
亦無專卷惟從別卷載漕倉三十九間內有舊倉二